

良鄉縣志

子勲署簽

良鄉縣志卷之七

物產志

穀屬 花屬 蔬屬 果屬 獸屬 鱗屬 貨屬 木屬 藥屬
草屬 禽屬 介屬 蟲屬

土之貢職必書自夏后氏昉也以阜其財求而利其器用兆民賴焉亦誌之惟悉蓋愛土服錘穉人成功俗之上也羽毛齒革化居懋遷俗之次也貨則棄於地力則匿於身皆竄媮生民罔攸恃俗之下也故君子重物產也

穀屬

黍

有白黃黑三種爾雅翼黍有赤黍黑黍黏者別名稭北人謂黃米亦曰黃糯李時珍曰稷之黏者爲黍粟之黏者爲秫梗之黏者爲糯今俗不知分別通呼秫與黍爲黃米矣

稷

有白黃黑三種羣芳譜一名稭一名黍關西謂之糜冀北謂之聚米似粟而稍大

色黃鮮麥後先諸米熟炊飯疎爽香美故以供祭

稻

羣芳譜一名稌有粳有糯粳卽杭也粳之小者謂之秈種類甚多北方地平惟澤土宜旱稻良地水泉不旺稻田甚少近年水碾屯葫蘆堡等村間有開渠引廣陽河種水稻者

粟

羣芳譜北方直名之曰穀脫穀則謂之小米實則五穀中之一梁屬也種類甚多熟有早晚北人日用不可缺者周禮地官註北方水土深厚窖地而藏可數十年不壞

麥

羣芳譜一名來俗稱小麥秋種夏熟具四時中和之氣兼寒熱溫涼之性繼絕續乏爲利甚普故爲五穀之貴亦可春種至夏便收然不及秋種者性有南北之異北地燥冬多雪春少雨麥晝花薄皮多麵食之宜人陳者更良

大麥

羣芳譜一名牟小麥磨麪作餅餌大麥止堪碾米作粥飯磨麪作醬及喂馬用他如穞麥燕麥雀麥大抵與麥一類而異種

蕎麥

羣芳譜一名收麥一名烏麥一名花蕎立秋前後下種密種則實多稀則少八九月熟最畏霜數年來又宜早種遲則少收

蜀黍

羣芳譜一名高粱一名蜀黍一名蘆稭一名蘆粟一名木稷一名荻粱米有二種黏者可和糯秫釀酒作餅不黏者可作糕煮粥亦可養畜莖可織箔編席夾籬供饔飧可作笊帚殼浸水色紅可以釀酒有利於民者最博良地所種近有數色有紅黃白之異

玉蜀黍

李時珍本草苗葉俱似蜀黍而肥矮高三四尺六七月開花成穗如秕麥狀苗心

別出一苞如櫻魚形苞上出白鬚垂垂久則苞拆子出顆顆攢珠黃白色可炒食炒拆白花如炒拆糯穀之狀亦可煮食亦可磨麪俗呼玉米

脂麻

羣芳譜一名油麻一名胡麻一名巨勝沈在中筆談云胡麻卽今油麻古者中國止有大麻張騫始自大宛得油麻種來故名胡麻李時珍曰脂麻有早晚二種黑白赤三色取油以白者爲勝

火麻

卽大麻也羣芳譜一名好麻一名漢麻雄者名梟牡麻雌者名苴麻苧麻五六月開細黃花成穗隨卽結實似蘇子而大剝其皮作麻績之可爲布其穢白而有稜細者可爲燭心

黑豆

羣芳譜豆者莢穀之總名也農書黑豆中最細者曰櫓豆一曰料豆北人以飼馬

小豆

畿輔通志有赤白二種又有雜色

綠豆

羣芳譜綠以色名也作棗非圓小者佳有二種粒粗而色鮮者爲官綠又名明綠皮薄粉多粒小而色暗者爲油綠又名灰綠皮厚粉少早種者名摘綠可頻摘也遲種名拔綠一拔而已可磨麪可作粥飯水泡磨爲粉可作餌蒸糕盪皮漏條夏日煮湯飲能清熱去暑爲食品中必需之物亦可飼牲畜

黃豆

羣芳譜有大小二種苗葉莢其與黑豆無異惟葉之色稍淡結角比黑豆稍肥其豆可食可醬可豉可油可腐腐之滓可喂猪荒年人亦可充饑油之滓可糞地其可然火葉名雀嫩時可爲茹

豌豆

羣芳譜種出西胡北土甚多八九月下種亦有春種者嫩時色青可煮食老則斑不可煮食可作麪食餽磨粉麪甚白而細膩百穀之中最爲先熟又耐久藏近都

中於冬春之間種苗食之其味甚鮮

扁豆

通雅脾豆扁豆也或作藊豆有紅白二種莢似羊眼或呼爲羊眼豆白者可入藥作果羹亦用之

蠶豆

太平御覽蠶豆亦名胡豆張騫使外國得種歸

稗

野生色深綠根下葉帶紫色梢頭出扁穗子如黍茶褐色可救荒

稊

苗似稗而穗如粟有紫毛卽烏禾也可救荒

穆子

羣芳譜一名龍爪粟一名鴨爪稗北地荒坡處種之苗葉似穀至頂抽莖有三稜開細花結穗如粟而分數岐狀如鷹爪子如黍而細

豇豆

本草一名豨薟嫩時充菜老則收之

菜豆

先熟者俗名五月鮮大而圓者名金剛圈青而長者名絲瓜青

刀豆

嫩青時烹食醬醃皆佳俗呼爲雲扁豆今有一豆來自外洋莢大於尋常數倍俗呼爲洋扁豆

薏米

煮粥炊飯磨麵食皆宜

蔬屬

葱

群芳譜一名薹一名菜伯一名和事草一名鹿胎畿輔舊志有四種曰凍曰胡曰

漢曰茗凍葱卽冬葱夏衰冬盛莖葉氣味俱軟美食用最善胡葱狀似大蒜而小形圓皮赤葉似葱根似蒜八月種五月收漢葱春末開花成叢青白色冬卽葉枯亦供食品茗葱卽山葱也似葱而小細莖大葉又有一種樓葱人呼爲羊角葱亦冬葱之類

韭

群芳譜一名豐本可生可熟可醃可久菜之最有益者爾雅翼韭者嬾人菜以其不須歲種也冬月移根窖中養以火炕培以馬糞葉長尺許不見風日色黃嫩謂之韭黃味甚美惟京師及天津有之

蒜

群芳譜一名葫一名大蒜一名葷菜處處有之而北土以爲常食苗嫩時可生食夏初莖秋月食種乾者可食至次年孫愐唐韵云初時中國止有小蒜張騫使西域始得大蒜種

芥

群芳譜一名辣菜種類不一葉可生食又可醃以爲菹可釀以爲齏子研末泡爲芥醬和菜侑肉辛香可啖霜降後取其根置罈甕中以鹽醃之脆如蘿蔔愈久愈佳北人以爲常食

芹

群芳譜一名楚葵一名水英赤白二種白芹取根赤芹莖葉並堪作菹又有一種馬芹爾雅謂之菱葉細銳可食亦芹類也

薤

群芳譜一名藟子一名菝葜子韭類也今俗呼爲小葱本草薤葉似韭而中空其體光滑露亦難停故古人有薤露之歌

椒

一名花椒又名秦椒以產自秦地故名葉青皮紅花黃膜白子黑秉五行之精最易蕃衍又有一種番椒白花子如禿筆頭色紅鮮味甚辣俗亦呼爲秦椒

茴香

一名懷香有大小二種味芳辛可作食料

蘼荑

一名胡荑味香生熟俱可食今人謂之香菜

蘿蔔

一名萊菔一名蘆菔一名紫花菘一名土酥處處有之北土尤多狀有長圓二類根有紅白紫三色生沙壤者脆而甘生瘠地者堅而辣根葉俱供食品可生可熟可菹可醢可醬可糖乃蔬中之最有益者又一種曰胡蘿蔔元時來自胡地故名葉碎根細長內外皆紅色心稍黃又有一種色青或紫生食味甘而微辣能降火化痰止嗽可以代梨俗謂之脆水蘿蔔

蔓菁

一名葍一名蕪菁一名諸葛菜四時皆有苗葉根俱堪食子可打油燃燈甚明

菠菜

一名菠薐一名赤根菜出西域頗陵國春初嫩而且美春暮漸老沸湯泡過曬乾

可久食

白菜

一名菘有二種一種莖扁薄春種夏食一種莖圓厚夏種秋收窖藏可以過冬菜中之最堪常食者羣芳譜黃芽菜白菜別種葉莖俱扁葉綠莖白惟心帶微黃燕京圃人以馬糞擁培不見風日苗葉皆嫩黃色脆美無滓佳品也

同蒿

莖肥葉綠有刻缺微似白蒿甘脆滑膩莖以佐日用最爲佳品

蒿苣

四月抽莖高三四尺生食味清脆醃食亦佳江東人鹽曬壓實以備方物謂之苣筍

蒼蓬

一名恭菜群芳譜葉青白色似白菜葉而短莖亦相類但差小耳煮熟食良

芸薹菜

一名油菜以子可打油也

山藥

負暄雜錄曰本名薯蕷唐代宗諱豫改薯蕷藥宋英宗諱曙遂名山藥

甘藷

群芳譜一名番藷有紅白二種北人多食之熟食味甘若以火煨熟其甘如栗今村村皆種幾與五穀爭功矣

擘藍

芥屬根極脆生熟俱可食凡菜類皆在土中此獨在土上

茄子

群芳譜一名落蘇有紫白二種紫者又名紫膨膨白者又名銀茄又一種白者名渤海茄形圓有蒂有萼大者如甌

蘑菇

卽地菌也博物志菌味美而常毒殺人

藕

爾雅荷芙蕖其根藕良無水田多坑種若作爲粉和糖沖食益人最大嫩時生食可代鮮果作菜佐饌亦佳

荸薺

舊名烏芋又名蔦茨

薺

爾雅可作菹及羹

莧

羣芳譜凡六種

藜

羣芳譜一名地膚處處有之苗嫩時可作蔬至秋而幹成子落以草束其腰用石壓扁可爲帚故又名獨帚今俗名呼爲掃帚苗

苦菜

一名苦蕒野生月令孟夏苦菜秀卽此物也味苦寒無毒夏日宜食能益心和血通氣

果屬

桃

種類甚多實有大小熟有早晚愈晚味愈甘以久經風露故也邑境所產果實桃爲最盛且佳美遠勝山桃

杏

有數種長安客話杏仁味皆苦有一種甘者名巴旦杏或謂之八丹杏食物本草杏仁雙生者有毒不可食

李

埤雅李性難老枝枯子亦不墜良產有紫黃二種

梨

有數種色形香味種種不同甘如蜜脆如菱可以消煩解渴果中之佳品也邑境所產如秋梨紅綰梨二種味既甘脆更耐久藏尤足供不時之需

棗

一名木密有數種大者棗小者棘孟子曰養其棘棘卽今之酸棗也齊民要術旱澇之地不任稼穡者種棗則任矣

蘋婆果

俗名蘋果有白赤青三種畿輔志其花紅白雅淡花中之最可愛者其果尤爲北地之佳品

林擒

畿輔志俗名甜果卽林擒又縣而沙者曰沙果

柰

羣芳譜樹與葉皆似林擒而實稍大有青赤白三種

柿

木中根固柿爲最其味甘美消煩解渴與梨同功古云柿凡有七絕一樹多壽二葉多陰三無鳥巢四少蟲蠹五霜葉可玩六嘉實可啖七落葉肥大可以臨書

石榴

博物志張騫使西域得自安石國

葡萄

漢書種出大宛張騫所致有綠紫白三種一種色白形長於棗而微瘦其味甘而不酸較圓者尤美俗謂之羊乳葡萄又一種實小而無核味極甘

核桃

一名羌桃又名胡桃以張騫自胡羌得其種故名

山查

俗名山裏紅本草有大小二種小者入藥若製爲糕色如珊瑚味甘酸極美

無花果

樹似胡桃不花而實生青熟紫味如柿而無核